

Mirsad Hadžikadić:

Da, to je prvi put da smo imali prenos predizbornog skupa uživo na Facebooku. Znam da je došlo do jednog prekida, ali onda je odmah nastavljeno sa prenosom. Bilo je interesantno od samog početka. Najavio sam da imamo predizborni skup u Mostaru a najveća stranka SDA je imala svoj skup u Banjaluci isti dan, pa su i oni imali prenos uživo, ali smo mi imali duplo više pratilaca tog dana, što je bilo odlično. Mostar je interesantan jer je to podijeljen grad: pola je bošnjački dio, a pola hrvatski – što znači da su tu muslimani i katolici. Nismo znali šta da očekujemo. Imali smo svoje ljude na terenu i njih troje su vrijedno radili na najavi skupa, iako su mediji u nečijem vlasništvu ili pod nečijim uticajem, tako da nismo imali mnogo medijske podrške kad je riječ o najavi događaja. Samim tim nismo znali ni šta da očekujemo. Lokacija je bila odlična - skup je održan u hotelu Bristol. Međutim, na kraju je bilo zaista sjajno. Došli su čak i ljudi iz Sarajeva i obližnjih gradova. Skup je održan u sali sa 120 sjedišta koja su sva ispunjena, tako da su neki ljudi stajali. Domaćin skupa bila je osoba sa lokalne televizijske i radio kuće. To je jedna divna mlada žena koja mi je i sama nakon skupa rekla da se može zamisliti da glasa nakon što dugo vremena nije glasala jer nije imala za koga, a sad je bila zaista inspirisana da glasa. Skup je otvorio lokalni muzičar svjetskom premijerom jedne pjesme. Zatim je jedan legendarni muzičar iz Mostara izveo a capella pjesmu. Nakon toga je jedan od najpoznatijih bosanskih komičara i glumaca koji nas prati na ovim skupovima imao svoj nastup, koji je trebao trajati 15 minuta a potrajao je 40 minuta. Bila je to kombinacija stand-up komedije i predstavljanja Mirsada. Onda sam ja održao govor koji je trajao 30-35 minuta. Atmosfera je bila jako prijateljska i publika je učestvovala tokom govora. Predvidjeli smo 15 do 20 minuta za pitanja publike, međutim to je potrajalo više od sat vremena. Na kraju smo morali prekinuti s tim, jer su neki ljudi morali da idu. Dakle, skup je trajao od 19:00 do 21:45. Bilo je mnogo entuzijazma. Mnogi mladi ljudi su došli na skup pa su i oni postavljali pitanja. Čini se da su došli čak i ljudi iz dijaspore i da su željeli da govore u moje ime. Bilo je jako zanimljivo. Obično 10-15 % prisutnih kući odu kao Iskre, kao što ih mi zovemo, Iskre promjene, a ovaj put je bilo oko 70% takvih. Svi su bili uzbuđeni i fotografisali su se. Postojala je svijest da je teško ali da moramo da vjerujemo i da moramo da radimo na tome. Obično ja moram da kažem ljudima da je ovo dugoročna borba i dugotrajan proces, ali ovaj put su zapravo oni mene ubjeđivali da ne

smijem da odustanem jer je to dugotrajna borba ali da mi moramo nastaviti bez obzira na ishod i osnovati stranku, jer oni zaista vide nešto drugo u ovome. Dakle, bio sam jako zabrinut za Mostar, naročito zato što je SDA stranka, bošnjačka stranka, jako dobro uspostavljena u Mostaru, kao i u ostatku države. Takođe, zbog toga što je to podijeljen grad, a katolici na mnogo načina i često kontrolišu finansije i druge stvari u tom gradu. Bošnjačka strana pokušava pomoći da se izabere hrvatski predstavnik Predsjedništva, odnosno uticati na izbor hrvatskog člana Predsjedništva, tako da će oni svi glasati za jednog Hrvata koji je otvoreno probosanski orijentisan, a kojem hrvatska zajednica zamjera. Zato ispada skoro kao da bošnjačka zajednica izabere Hrvata, a i mogu to, brojčano. Dakle, u tom gradu gdje postoji velika tendencija da se glasa za SDA ili tendencija da se glasa za boljeg Hrvata, se pojavljujemo mi, i zato sam bio zabrinut da niko neće doći na taj skup. Ali nije bilo tako, i došlo je mnogo više posjetilaca nego što sam mislio, grupa ljudi koji žele nešto drugo, nešto drugačije. Bit će teško ovo nadmašiti po pitanju entuzijazma i pozitivne energije koju smo kreirali. Ljudi su vidjeli nešto drugo. Svi koji su prisustvovali su zaista željeli da budu tu i došli su zato što žele promjene, naspram drugih skupova gdje dođu ljudi koji su plaćeni da se pojave ili da naruše skup i nikad se niko novi ne pojavi, osim ljudi koji su već članovi stranke. Dakle, prema ljudima koji su prisustvovali, bilo je sjajno. Glavni organizator događaja, predsjedavajući naše lokalne organizacije u Mostaru me zvao danas tri puta, da mi kaže kako nakon događaja ljudi u gradu pričaju o tome. On je imao nekoliko poslovnih sastanaka sa ljudima koji su igrom slučaja iz drugih stranaka, i na jednom sastanku je bilo 6-7 ljudi, i prema njemu su svi oni rekli da su čuli za događaj i da sad svi znaju da je on sa tim Bosanskim Amerikancem, i da sad znaju odakle mu novac za biznis. Tako da je on rekao: „Mirsade, možda ti to ne znaš, ali ti si mi dao novac za moj biznis, i tako sam ga ja pokrenuo“. To su bosanske teorije zavjere, znaš: ako imaš nešto, to znači da ti je to neko dao. Ako je on sa mnom, sa Amerikancem, onda je taj biznis očito pokrenut američkim novcem. Bilo kako bilo, postoji cijena za sve.

Clark Curtis:

Mora da te ohrabrio takav odziv sinoć, kao i to da će ti ljudi dalje proširiti vijesti. To će pomoći da se tvoja poruka pročuje na načine koji ti do sada vjerovatno nisu bili dostupni.

Mirsad Hadžikadić:

Da. Mi računamo na ljude da odu kući s porukom, da razgovaraju sa komšijama i prijateljima, kolegama. Nijedno sinošnje pitanje nije se odnosilo na debatu na N1 gdje je postavljeno pitanje o istospolnim brakovima. Nijedno pitanje. To mi je jako zanimljivo, i to mi znači da ta tema blijedi. U Minhenu u Njemačkoj je bila velika grupa naših pristalica koji su jako religiozni. Oni su bili šokirani kad je moj odgovor bio da bih podržao istospolne brakove. Oni su se aktivno okrenuli protiv mene, a onda sam ja izdao saopštenje zašto to mislim, i koja su moja uvjerenja, što ih je malo omekšalo, ali ipak je to još uvijek bilo upitno. Zatim sam tražio sastanak sa vođom koji je pokretao ta pitanja o cijeloj toj tematici. Danas sam s njim imao sjajnu konverzaciju, i on je rekao da razumije moje objašnjenje i da je u redu. Razgovarali smo o tome, i na kraju sastanka je on rekao da će me svi oni ponovo podržati i da ne brinem o tome, da će pokušati da prošire mrežu podrške i pitao je kako još oni mogu pomoći. Dakle, kao i u svakom političkom procesu, idete kroz uspone i padove, kroz neke teme koje nisu problemi i neke teme koje postanu problemi. Interesantno je vidjeti kako i vama podigne nivo energije ili vas deprimira reakcija javnosti i ljudi oko vas i vašeg tima, i kako je potreban tako mali osjećaj da je neko napadnut pa da odmah počnete sve da preispitujete – da li je to pravi pristup, da li smo trebali to reći. Takođe je interesantna vrijednost ostajanja na istom kursu. Ako znate da ste u pravu i odlučite da ostanete pri svom stavu i svom sistemu vrijednosti, na kraju izađe na dobro, jer ja ni u jednom trenutku nisam doveo u pitanje to što sam rekao, ali sam želio objasniti ljudima koja je osnova za to, i to je sve. Oni mogu formirati svoje mišljenje i neki će glasati za mene a neki neće, ali bilo je mnogo lakše proći kroz cijeli taj proces znajući da ni u jednom trenutku ja neću promijeniti svoj odgovor. Odgovor je takav kakav je i ako želite možete poslušati objašnjenje. Ako ne želite, i to je u redu. Međutim, bilo je interesantno vidjeti kako ljudi oko vas reaguju i kako vam ubjeđenja pomažu da navigirate i odlučite šta da uradite, kada i kako da to uradite kad ste pod pritiskom. Ovo je bila sjajna lekcija za sve to, uključujući danas kad sam napustio sastanak u hotelu Evropa i krenuo na ručak, i kad me jedna žena vidjela i zaustavila da mi kaže da nije željela glasati ali da će sada ona i četiri člana njene porodice glasati. Dok smo nas dvoje razgovarali, prišao je drugi čovjek i rekao da mu je drago što me vidi i da mi savjetuje da nešto stavim u svoj program. Okrepljujući su svi ti susreti na kojima ljudi kažu da će glasati za mene i to je odlično, ali kad oni onda nešto predlože da se stavi u program, to je već sljedeći nivo aktivnosti. To znači da je neko

identifikovao problem i razmišljao o rješenju, i onda prišao meni jer ću ja biti u situaciji da bar govorim o toj nekoj temi. Da, to je ohrabrujuće i interesantno.

Clark Curtis:

Osjetim da se energija koju ti osjećaš sada mijenja, od onih ranih javnih tribina do ovih sada predizbornih skupova. Spomenuo si to. Po tvom ličnom stanovištu, takva energija se može samo osjetiti ako ste zapravo fizički prisutni tu. Kakav je osjećaj o tome šta se mijenja i šta to znači za tebe i tvoj tim za kampanju kada vidite tu promjenu sad kad je preostalo još samo par sedmica do izbora?

Mirsad Hadžikadić:

Da. Odlučili smo da održimo manji broj predizbornih skupova (10) nego ranijih javnih tribina, kojih smo imali 20 do 25. Zato pažljivo biramo gdje idemo. Biramo veće gradove a promoviramo te događaje u manjim gradovima tako da i oni mogu ići. Sad postoji osjećaj veće ozbiljnosti, i da je to prava stvar. Sad postoji i zabrinutost o tome da se napune sale, da bude dobra posjećenost, jer ako nije, onda se fotografišete ili snimate a to je poruka konkurenciji da mi ne možemo da napunimo neku salu. Postoji i veći osjećaj ponosa kad se to zapravo dogodi. Na javnim tribinama, čak i ako se samo 20 ljudi pojavi, cijeli događaj će biti održan bez obzira na to. Ali sada, ako je mjesto događaja puno, to je potvrda vaših uvjerenja, a ako nije puno onda se zabrinete zašto je to tako, je li zbog poruke, je li zbog lokalne organizacije, je li zbog najave događaja i je li ona kako treba obavljena, ili je zbog toga što je neko lokalno odjeljenje jedne od ključnih stranaka odlučilo da učini sve što je u njihovoj moći da vas spriječe da oglasite svoj događaj ili da spriječe ljude da dođu na skup. Dakle, sad je sve uveličano i sve je drugačije, ali takođe vidite da, kad sve prođe dobro, svi su zadovoljni i svi su spremni da urade i više. Naši dani su ispunjeni. Sada izdajemo i više saopštenja za javnost nego što smo ranije. Prije smo izdavali jedno ili dva sedmično, a sada izdajemo dva-tri dnevno, gdje iznosimo svoje reakcije na interesantne stvari i pokušavamo da se pojavimo na raznim događajima. Večeras smo u jednoj od lokalnih zajednica. To nije predizborni skup, ali su ljudi iz tog komšiluka rekli da imaju 50-70 ljudi koji samo žele da se pojavim tako da mogu postavljati pitanja na koja ću ja odgovarati. U nedjelju imamo takmičenje u odbojci dva na dva, i nadati se da će mnogi ljudi doći. To je cjelodnevni događaj na kojem će biti hrana, roštilj, muzika. Dakle, da. Svaka šetnja gradom sada

je drugačija. Sad se jedan Bosanac iz Amerike o kom sam ti pričao, koji ima BMW i svoju prevoznčku kompaniju, vratio kući i na svom automobilu napisao velikim slovima Mirsad Hadžikadić sa obje strane i stavio moju veliku fotografiju na zadnjem dijelu automobila. Gdje god putujemo sada, idemo tim automobilom, i kad ja izađem iz automobila i moja fotografija je tu, vidite da ljudi sad obraćaju pažnju na to. To je crni BMW sa reklamom i ne može se propustiti. Taj čovjek će takođe nabaviti zvučnike tako da ćemo kad putujemo gradovima samo pustiti muziku i našu poruku i provozati se gradom. Dakle, da, smišljamo sve što možemo da dopremo do ljudi.